



## შპს აღმოსავლეთ ევროპის უნივერსიტეტი

### მაგისტრატურის საგანმანათლებლო პროგრამების სამეცნიერო-კვლევითი კომპონენტის დაგეგმვის, განხორციელებისა და შეფასების მინიმალური სტანდარტი

#### თავი I. ზოგადი დებულებანი

##### მუხლი 1. მაგისტრატურის საგანმანათლებლო პროგრამების სამეცნიერო-კვლევითი კომპონენტი

1. წინამდებარე მინიმალური სტანდარტი „უმაღლესი განათლების შესახებ“ საქართველოს კანონისა და სხვა ნორმატიული-სამართლებრივი აქტების შესაბამისად, ადგენს აღმოსავლეთ ევროპის უნივერსიტეტის (შემდგომ - „უნივერსიტეტი“) მაგისტრატურის საგანმანათლებლო პროგრამების სამეცნიერო-კვლევითი კომპონენტის დაგეგმვის, განხორციელებისა და შეფასების წესს.
2. სამეცნიერო-კვლევითი კომპონენტი არის მაგისტრატურის საგანმანათლებლო პროგრამის შემადგენელი ნაწილი, რომელიც კონკრეტულ საგანმანათლებლო პროგრამაში შეიძლება, წარმოდგენილი იყოს სამაგისტრო ნაშრომის ან სხვა სამეცნიერო პროექტის სახით (შემდგომში - სამაგისტრო ნაშრომი).
3. მაგისტრატურის საგანმანათლებლო პროგრამის სამეცნიერო-კვლევითი კომპონენტის მიზანია, ჩამოუყალიბოს მაგისტრანტს შერჩეულ სფეროში კვლევის დამოუკიდებლად განხორციელების, მიღწეული შედეგების წარმოჩენისა და საკუთარი მსჯელობის საჯაროდ და არგუმენტირებულად გადმოცემის უნარი.
4. მაგისტრატურის საგანმანათლებლო პროგრამა უნდა ითვალისწინებდეს მაგისტრანტის მიერ ისეთი კვლევების დამოუკიდებლად ჩატარებას ან ისეთი აქტივობების განხორციელებას, რომელთა საფუძველზეც ის შეძლებს სამაგისტრო ნაშრომის ან/და პროექტის წარდგენას, მიმართულების, დარგის/სპეციალობის ან ქვედარგის/სპეციალიზაციის თავისებურებების გათვალისწინებით.
5. მაგისტრატურის საგანმანათლებლო პროგრამის სამეცნიერო-კვლევითი კომპონენტის შესრულება დასტურდება სამაგისტრო ნაშრომის შესრულებითა და მისი საჯარო დაცვით (პრეზენტაცია, დისკუსია).

##### მუხლი 2. ტერმინთა განმარტება

1. მაგისტრატურა - აკადემიური უმაღლესი განათლების მეორე საფეხური;

2. მაგისტრატურის საგანმანათლებლო პროგრამა – აკადემიური უმაღლესი განათლების მეორე საფეხურის საგანმანათლებლო პროგრამა, რომლის სწავლის შედეგებიც შეესაბამება ეროვნული კვალიფიკაციების ჩარჩოს მე-7 დონისათვის განსაზღვრულ განზოგადებულ სწავლის შედეგებს;
3. მაგისტრანტი – სტუდენტი, რომელიც სწავლობს მაგისტრატურაში.
4. მაგისტრი – მფლობელი იმ აკადემიური ხარისხისა, რომელიც პირს მაგისტრატურის საგანმანათლებლო პროგრამით გათვალისწინებული კრედიტების რაოდენობის ათვისების შედეგად ენიჭება.

### **მუხლი 3. სამაგისტრო ნაშრომი**

1. მაგისტრანტის მიერ საგანმანათლებლო პროგრამის ფარგლებში ჩატარებული დამოუკიდებელი სამეცნიერო კვლევის დასაბუთებული შედეგები აისახება მის მიერ შესრულებულ სამაგისტრო ნაშრომში.
2. სამაგისტრო ნაშრომზე მუშაობა მიმდინარეობს ხელმძღვანელობით განხორციელებული კვლევისა და სტუდენტის დამოუკიდებელი მუშაობის ფორმატში.
3. სამაგისტრო ნაშრომი არის მაგისტრანტის მიერ, აკადემიური კეთილსინდისიერების პრინციპების დაცვით, ინდივიდუალურად შესრულებული სამეცნიერო-კვლევითი ნამუშევარი, რომელიც უნდა ასახავდეს მაგისტრანტის უნარს, ჩაატაროს სამეცნიერო-კვლევითი სამუშაოები.
4. სამაგისტრო ნაშრომში მაგისტრანტმა უნდა აჩვენოს მიმართულების, დარგის/სპეციალობის ან ქვედარგის/სპეციალიზაციის ღრმა და სისტემური ცოდნა, მათ შორის, უნდა გადმოსცეს ისეთი სპეციფიკური მეთოდები/საკითხები, რომელთა ძირითადი ნაწილიც ასახავს კვლევაზე დაფუძნებულ ახალ ცოდნას ან/და პროფესიულ პრაქტიკას.
5. მაგისტრანტმა სამაგისტრო ნაშრომში უნდა შეძლოს პრობლემების გადაწყვეტის ახალი, ორიგინალური გზების მოძიება და უახლესი მეთოდებისა და მიდგომების გამოყენებით გამოავლინოს კვლევის დამოუკიდებლად განხორციელების უნარი.
6. სამაგისტრო ნაშრომში უნდა ჩანდეს, რომ მაგისტრანტს შეუძლია კომპლექსური ინფორმაციის (მათ შორის უახლესი კვლევების) კრიტიკული ანალიზის საფუძველზე, დასაბუთებული დასკვნების ჩამოყალიბება, მონაცემებზე დაყრდნობით ინფორმაციის ინოვაციური სინთეზი და შეფასება, კვლევის დამოუკიდებლად განხორციელება.
7. სამაგისტრო ნაშრომში შემოქმედებითად უნდა იყოს გამოყენებული თანამედროვე საინფორმაციო და საკომუნიკაციო ტექნოლოგიები დარგის თავისებურებების გათვალისწინებით.
8. მაგისტრატურის ქართულენოვან საგანმანათლებლო პროგრამაზე სამაგისტრო ნაშრომი შესრულებული უნდა იყოს ქართულ ენაზე, ხოლო მაგისტრატურის ინგლისურენოვან საგანმანათლებლო პროგრამაზე – ინგლისურ ენაზე.
9. სამაგისტრო ნაშრომის გაფორმების წესს (მოცულობა, ფორმატი, სტილი და სხვა ტექნიკური მონაცემები) შესაბამისი ფაკულტეტის დეკანის წარდგინებით ამტკიცებს ფაკულტეტის საბჭო.
10. მაგისტრატურის საგანმანათლებლო პროგრამის სამეცნიერო-კვლევითი კომპონენტის (სამაგისტრო ნაშრომის) მოცულობა განისაზღვრება შესაბამისი საგანმანათლებლო პროგრამის სპეციფიკის გათვალისწინებით, რაც არ შეიძლება იყოს 20 კრედიტზე ნაკლები და 30 კრედიტზე მეტი.

#### **მუხლი 4. დაშვების წინაპირობები**

1. მაგისტრატურის საგანმანათლებლო პროგრამის სამეცნიერო-კვლევით კომპონენტზე დაშვების წინაპირობები განისაზღვრება შესაბამისი საგანმანათლებლო პროგრამით.
2. მაგისტრატურის საგანმანათლებლო პროგრამის სამეცნიერო-კვლევითი კომპონენტზე რეგისტრირების უფლება აქვს მაგისტრანტს, საგანმანათლებლო პროგრამით გათვალისწინებული დაშვების წინაპირობების დაკმაყოფილების შემთხვევაში.

#### **თავი II. სამეცნიერო-კვლევითი კომპონენტის დაგეგმვა**

#### **მუხლი 5. სამაგისტრო ნაშრომის თემისა და ხელმძღვანელის რეგისტრაცია**

1. მაგისტრანტის მიერ სამაგისტრო თემისა და სამეცნიერო ხელმძღვანელის/თანახელმძღვანელის შერჩევა, სამაგისტრო პროგრამის ფარგლებში, დაშვების წინაპირობების არსებობისას, წარმოებს სემესტრის დაწყებიდან 4 კალენდარული დღის ვადაში.
2. სამაგისტრო თემისა და ხელმძღვანელის წინასწარი რეგისტრაცია წარმოებს შესაბამისი სამაგისტრო პროგრამის ხელმძღვანელთან. ამასთან, უნივერსიტეტი უზრუნველყოფს მაგისტრანტს სამეცნიერო ხელმძღვანელით.
3. სამაგისტრო თემის სათაურისა და ხელმძღვანელის წინასწარი რეგისტრაციის შემდეგ მაგისტრანტი იწყებს სამაგისტრო კვლევის პროექტზე/პროსპექტუსზე მუშაობას.
4. სამაგისტრო კვლევის პროექტის წარდგენამდე, კონსულტაციისათვის განკუთვნილ დროს, წარმოებს მაგისტრანტისა და სამაგისტრო ნაშრომის სამეცნიერო ხელმძღვანელის მოსაზრებათა შეჯერება.
5. მაგისტრანტს უფლება აქვს, სამაგისტრო კვლევის პროექტის წარდგენამდე, სამეცნიერო ხელმძღვანელთან შეთანხმებით, მოითხოვოს შერჩეული თემის კორექტირება.

#### **მუხლი 6. მაგისტრანტის ხელმძღვანელი**

1. მაგისტრანტის სამეცნიერო ხელმძღვანელი შეიძლება იყოს უნივერსიტეტის აკადემიური/მოწვეული პერსონალი, რომელსაც გააჩნია მაგისტრანტის სამაგისტრო ნაშრომთან დაკავშირებულ სამეცნიერო სფეროში კვლევის გამოცდილება და შესაბამისი პუბლიკაციები.
2. სამეცნიერო ხელმძღვანელმა ერთდროულად შეიძლება, უხელმძღვანელოს მაქსიმუმ 5 მაგისტრანტს სემესტრის განმავლობაში.
3. ხელმძღვანელობით განხორციელებული კვლევის ფარგლებში სამეცნიერო ხელმძღვანელი ვალდებულია:
  - ა. დახმარება აღმოუჩინოს მაგისტრანტს სამაგისტრო თემის შერჩევაში, სამაგისტრო ნაშრომის სტრუქტურის ფორმირებაში, ძირითადი წყაროების იდენტიფიცირებაში, დაზუსტებასა და მოძიებაში, ასევე კვლევის პროექტის შედგენაში.
  - ბ. კონსულტაციები გაუწიოს მაგისტრანტს საკვლევი საკითხის ჩამოყალიბებასთან, კვლევის დიზაინის შემუშავებასთან, კვლევის მეთოდების განსაზღვრასთან და ა.შ. დაკავშირებულ საკითხებზე;

- გ. მიაწოდოს მაგისტრანტს სრული ინფორმაცია ნაშრომის შემუშავების ზოგადი რეგულაციების, მათ შორის, აკადემიური ეთიკის, მონაცემთა დაცვის, პლაგიატის საკითხების, ასევე ნაშრომის მომზადებასთან, წარდგენასთან და შეფასებასთან დაკავშირებული პროცედურების შესახებ;
- დ. დახმარება აღმოუჩინოს მაგისტრანტს ნაშრომის მომზადების პროცესში წამოჭრილი პრობლემების გადაჭრაში, ასევე ვადების განსაზღვრასა და დროის ეფექტიანად განაწილებაში, ნაშრომის შესრულების ძირითადი ეტაპების დაგეგმვაში, ნაშრომის სტრუქტურის განსაზღვრაში, კვლევისათვის საჭირო მონაცემების მოპოვებაში;
- ე. განუმარტოს მაგისტრანტს მისი უფლებები და მოვალეობები.
4. სამეცნიერო ხელმძღვანელი ახორციელებს კონტროლს მაგისტრანტის მიერ კვლევითი კომპონენტის გეგმის (დანართი 1) შესრულებაზე. სამეცნიერო ხელმძღვანელი ვალდებულია, მაგისტრანტის მიერ კვლევითი კომპონენტის გეგმის დარღვევის შემთხვევაში დროულად აცნობოს ფაკულტეტის ადმინისტრაციას.

### **მუხლი 7. სამაგისტრო კვლევის პროექტი/პროსპექტუსი**

1. სამაგისტრო კვლევის პროექტი წარმოადგენს სამაგისტრო ნაშრომის წინასწარ მონახაზს, რომელზე მუშაობაც მიმდინარეობს ხელმძღვანელობით განხორციელებული კვლევისა და სტუდენტის დამოუკიდებელი მუშაობის ფორმატში.
2. სამაგისტრო თემის წინასწარი რეგისტრაციიდან 10 კალენდარული დღის ვადაში, მაგისტრანტი სამაგისტრო კვლევის პროექტს წარუდგინოს სამაგისტრო პროგრამის ხელმძღვანელს, რომელსაც თან უნდა ერთოდეს თემის ხელმძღვანელის წერილობითი დასკვნა იმის შესახებ, რომ იგი გაეცნო სამაგისტრო კვლევის პროექტს და პროექტი მზად არის დასამტკიცებლად.
3. სამეცნიერო-კვლევითი პროექტის არქიტექტონიკას (მოცულობა, ფორმატი, სტილი და სხვა ტექნიკური მონაცემები) ამტკიცებს ფაკულტეტის საბჭო ფაკულტეტის დეკანის წარდგინებით.
4. სამაგისტრო კვლევის პროექტი უნდა მოიცავდეს:
  - ა. შესავალს (ზოგად დახასიათებას, სიახლეს, აქტუალობას, მიზნებს, კვლევის მეთოდებს);
  - ბ. ძირითად საკვლევ საკითხებსა და ნაშრომის სავარაუდო სტრუქტურას;
  - გ. ბიბლიოგრაფიას (პირველწყაროების, სამეცნიერო და სხვა ლიტერატურის მიმოხილვას).
5. სამაგისტრო კვლევის პროექტის საჯარო პრეზენტაცია წარმოებს, სემესტრის მე-3 სასწავლო კვირაში, ფაკულტეტის დეკანის მიერ შექმნილი სპეციალური კომისიის წინაშე.
6. კომისიაში უნდა შედიოდნენ შესაბამისი მიმართულების/დარგის აკადემიური/მოწვეული პერსონალის წარმომადგენლები.
7. მაგისტრანტი კომისიის წინაშე წარმოადგენს დასრულებული სახით მომზადებულ და სათანადოდ გაფორმებულ სამაგისტრო კვლევის პროექტს, PowerPoint-ის გამოყენებით მოახდენს მის საჯარო პრეზენტაციას და უპასუხებს კომისიის წევრთა დასმულ შეკითხვებს.
8. სამაგისტრო კვლევის პროექტისადმი წაყენებული შენიშვნებისა თუ რეკომენდაციების გათვალისწინება მაგისტრანტისთვის სავალდებულოა შესასრულებლად.
9. სპეციალური კომისია ხმათა უმრავლესობით განსაზღვრავს მაგისტრანტის სამაგისტრო თემას, სამეცნიერო ხელმძღვანელს და წარუდგენს ფაკულტეტის საბჭოს დასამტკიცებლად.
10. ფაკულტეტის საბჭო ამტკიცებს მაგისტრანტის სამაგისტრო თემას და სამეცნიერო ხელმძღვანელს სპეციალური კომისიის მიერ გადაწყვეტილების მიღებიდან 3 კალენდარული დღის ვადაში.

### **თავი III. სამეცნიერო-კვლევითი კომპონენტის წარდგენა**

## მუხლი 8. სამაგისტრო ნაშრომის წარდგენა

1. მაგისტრანტი სამაგისტრო ნაშრომის სამ აკინძულ ბეჭდურ ეგზემპლარს და მის ელექტრონულ ვერსიას (PDF ფორმატში), სემესტრის მე-16 სასწავლო კვირას, წარუდგენს შესაბამისი ფაკულტეტის ადმინისტრაციას, რომელსაც თან უნდა ახლდეს განცხადება ფაკულტეტის დეკანის სახელზე სამაგისტრო ნაშრომის განსახილველად მიღების შესახებ.
2. წარდგენილ სამაგისტრო ნაშრომს თან უნდა დაერთოს მაგისტრანტის ახსნა-განმარტება იმის თაობაზე, რომ ნაშრომი მის მიერ არის შესრულებული, არ შეიცავს აკადემიური კეთილსინდისიერების დარღვევის ელემენტებს, ორიგინალურია და გამოყენებული ყველა წყარო სათანადოდაა მითითებული.
3. სამაგისტრო ნაშრომის დაგვიანებით წარდგენის შემთხვევაში, მაგისტრანტი მიმდინარე სემესტრში დასკვნით გამოცდაზე/სამაგისტრო ნაშრომის საჯარო დაცვაზე არ დაიშვება. ამასთან, მაგისტრანტი თავისუფლდება სემესტრული რეგისტრაციისა და სწავლის გადასახადისგან სამაგისტრო ნაშრომის წარდგენის შემდგომი სემესტრიდან.
4. ფაკულტეტი, სამაგისტრო ნაშრომის წარდგენიდან 2 კალენდარული დღის ვადაში, ამოწმებს ნაშრომს მსგავსების აღმომჩენი ელექტრონული პროგრამით და გადამოწმების შედეგებს სამაგისტრო ნაშრომთან ერთად გადასცემს მაგისტრანტის სამეცნიერო ხელმძღვანელს.
5. მაგისტრანტის სამეცნიერო ხელმძღვანელი მსგავსების აღმომჩენი ელექტრონული პროგრამით სამაგისტრო ნაშრომის გადამოწმების შედეგების მიღებიდან 5 კალენდარული დღის ვადაში აფასებს სამაგისტრო ნაშრომს და გასცემს წერილობით დასკვნას სამაგისტრო ნაშრომის დასკვნით გამოცდაზე/საჯარო განხილვაზე დაშვების ან დაუშვებლობის შესახებ.
6. სამაგისტრო ნაშრომის შესახებ მაგისტრანტის ხელმძღვანელის წერილობით დასკვნაში უნდა აღინიშნოს:
  - ა. მაგისტრანტის სახელი, გვარი;
  - ბ. სამაგისტრო ნაშრომის სათაური;
  - გ. სამაგისტრო თემის აქტუალობა;
  - დ. განხორციელებული კვლევის ხარისხი და მნიშვნელობა;
  - ე. ნაშრომის ძლიერი და სუსტი მხარეები;
  - ვ. ნაშრომის თეორიული ან/და პრაქტიკული ღირებულება;
  - ზ. ინფორმაცია მსგავსების აღმომჩენი ელექტრონული პროგრამის წარმატებით გავლის შესახებ;
  - თ. რეკომენდაცია იმის შესახებ, რომ ნაშრომი მზად არის დასკვნით შეფასებაზე წარსადგენად.
7. იმ შემთხვევაში, თუ მსგავსების აღმომჩენი ელექტრონული პროგრამით სამაგისტრო ნაშრომის გადამოწმების შედეგად მაგისტრანტის სამეცნიერო ხელმძღვანელს უჩნდება ეჭვი სამაგისტრო ნაშრომში პლაგიატის არსებობის შესახებ, იგი ვალდებულია, ფაკულტეტის ადმინისტრაციას წარუდგინოს წერილობითი დასკვნა სამაგისტრო ნაშრომში პლაგიატის ნიშნების აღმოჩენის შესახებ.
8. ამ მუხლის მე-7 ნაწილით გათვალისწინებულ შემთხვევაში, ფაკულტეტის დეკანი ნიშნავს აკადემიური კეთილსინდისიერების შემოწმების კომისიას და პლაგიატის საკითხის განხილვის თარიღს.

## მუხლი 9. აკადემიური კეთილსინდისიერების შემოწმების კომისია

1. აკადემიური კეთილსინდისიერების შემოწმების კომისია შედგება ფაკულტეტის აკადემიური პერსონალის არანაკლებ 3 და არაუმეტეს 5 წევრისგან.
2. მაგისტრანტს წერილობითი ფორმით ეგზავნება შეტყობინება პლაგიატის საკითხის განხილვის თარიღის შესახებ.
3. მაგისტრანტს უფლება აქვს, დაესწროს საკითხის განხილვას და ისარგებლოს სიტყვის უფლებით. მაგისტრანტს უფლება აქვს მიაწოდოს კომისიას თავის ხელთ არსებული ინფორმაცია და მტკიცებულებები საკუთარი პოზიციის დასაცავად.
4. კომისია იღებს დასაბუთებულ გადაწყვეტილებას, რომელიც წერილობითი სახით ეცნობება ფაკულტეტის ადმინისტრაციას და მაგისტრანტს.
5. წარდგენილ სამაგისტრო ნაშრომში პლაგიატის დადასტურების შემთხვევაში, ფაკულტეტის დეკანი კომისიის დასკვნას წარუდგენს უნივერსიტეტის რექტორს, რომელიც უნივერსიტეტის სამართლებრივი აქტებით დადგენილი წესით, იღებს გადაწყვეტილებას მაგისტრანტის მიმართ დისციპლინური პასუხისმგებლობის გამოყენების შესახებ.

#### **თავი IV. სამეცნიერო-კვლევითი კომპონენტის დაცვა (დასკვნითი გამოცდა)**

##### **მუხლი 10. სამაგისტრო ნაშრომის დაცვის კომისია**

1. დასკვნითი გამოცდის/სამაგისტრო ნაშრომის დაცვის თარიღისა და კომისიის შემადგენლობის (მათ შორის, კომისიის თავმჯდომარის) შესახებ გადაწყვეტილებას, სემესტრის მე-17 სასწავლო კვირას, იღებს ფაკულტეტის დეკანი.
2. დასკვნითი გამოცდის/სამაგისტრო ნაშრომის დაცვის კომისია უნდა შედგებოდეს უნივერსიტეტის აკადემიური/მოწვეული პერსონალისაგან, რომლებსაც გააჩნიათ მაგისტრანტის სამაგისტრო ნაშრომთან დაკავშირებულ სამეცნიერო სფეროში კვლევის გამოცდილება და შესაბამისი პუბლიკაციები.
3. სამაგისტრო ნაშრომის დაცვის კომისია უნდა შედგებოდეს არანაკლებ 5 წევრისგან. ამასთან, კომისიის შემადგენლობის მინიმუმ ერთი წევრი უნდა იყოს სხვა უსდ-ის წარმომადგენელი.
4. ფაკულტეტი ვალდებულია, კომისიის წევრებს, კომისიის შემადგენლობის დამტკიცებიდან 2 სამუშაო დღის ვადაში, გაუგზავნოს სამაგისტრო ნაშრომების ელექტრონული ვერსიები (PDF ფორმატში).
5. სამაგისტრო ნაშრომის დაცვის კომისიის წევრები ვალდებული არიან, დასკვნით გამოცდამდე გაეცნონ ფაკულტეტის მიერ გადაცემული სამაგისტრო ნაშრომების შინაარსობრივ მხარეს.

##### **მუხლი 11. დასკვნითი გამოცდა/სამაგისტრო ნაშრომის დაცვა**

1. დასკვნითი გამოცდა/სამაგისტრო ნაშრომის დაცვა არის საჯარო. ინფორმაცია სამაგისტრო ნაშრომის დაცვის შესახებ ქვეყნდება უნივერსიტეტის (შესაბამისი ფაკულტეტის) ვებგვერდზე სამაგისტრო ნაშრომის დაცვამდე მინიმუმ 3 დღით ადრე.
2. დასკვნითი გამოცდის/სამაგისტრო ნაშრომის დაცვის მიმდინარეობისას მაგისტრანტი წარმოაჩენს განხორციელებული სამეცნიერო-კვლევის შედეგებს.
3. დასკვნითი გამოცდის/სამაგისტრო ნაშრომის დაცვის რეგლამენტი განისაზღვრება ფაკულტეტის საბჭოს მიერ.

##### **მუხლი 12. სამაგისტრო ნაშრომის დაცვის კომისიის უფლებამოსილება**

1. სამაგისტრო ნაშრომის დაცვის კომისია უზრუნველყოფს სამაგისტრო ნაშრომის დაცვის პროცედურის ჩატარებას და მოქმედი კანონმდებლობით, წინამდებარე დებულებით და ფაკულტეტის საბჭოს მიერ დადგენილი შეფასების მეთოდებისა და კრიტერიუმების გათვალისწინებული წესით აფასებს სამაგისტრო ნაშრომს.
2. სამაგისტრო ნაშრომის დაცვა შეიძლება დაინიშნოს დაცვის თარიღზე ფაკულტეტის დეკანის მიერ გადაწყვეტილების მიღებიდან 5 კალენდარული დღის შემდეგ.
3. დასკვნით გამოცდაზე/სამაგისტრო ნაშრომის დაცვაზე კომისიის წევრები/გამომცდელები დამოუკიდებელი არიან თავიანთ საქმიანობაში. ამასთან, დასკვნითი გამოცდის/სამაგისტრო ნაშრომის დაცვის კომისიის სხდომა უფლებამოსილია თუ მას ესწრება კომისიის წევრთა 2/3-ზე მეტი მაინც.
4. სამაგისტრო ნაშრომის დაცვის კომისიის ერთ სხდომაზე შეიძლება დაინიშნოს მაქსიმუმ ხუთი სამაგისტრო ნაშრომის დაცვა.

### **მუხლი 13. დასკვნითი გამოცდის/სამაგისტრო ნაშრომის დაცვის შეფასება**

1. სამაგისტრო ნაშრომი ფასდება იმავე ან მომდევნო სემესტრში, რომელშიც მაგისტრანტი დაასრულებს მასზე მუშაობას.
2. სამაგისტრო ნაშრომი ფასდება ერთჯერადად, დასკვნითი შეფასებით. სამაგისტრო ნაშრომის დაცვის კომისიის წევრების მიერ სტუდენტის შეფასება ხდება კონფიდენციალურად, ასქულიანი სისტემით.
3. სამაგისტრო ნაშრომის დაცვის კომისიის თითოეული წევრი სამაგისტრო ნაშრომის შინაარსობრივ მხარეს, მის საჯარო პრეზენტაციასა და მაგისტრანტის დისკუსიაში მონაწილეობას აფასებს შესაბამისი ფაკულტეტის საბჭოს მიერ დადგენილი მეთოდებისა და კრიტერიუმების შესაბამისად.
4. დასკვნითი გამოცდის/სამაგისტრო ნაშრომის დაცვის საბოლოო ქულა განისაზღვრება მიღებული ქულების საშუალო არითმეტიკულით (მიღებული ქულების ჯამი გაყოფილი კომისიის წევრთა რაოდენობაზე).
5. კრედიტის მიღება შესაძლებელია მხოლოდ კანონმდებლობით გათვალისწინებული ერთ-ერთი დადებითი შეფასების მიღების შემთხვევაში.
6. შეფასების სისტემა უშვებს ხუთი სახის დადებით შეფასებას:
  - ა. (A) ფრიადი – შეფასების 91-100 ქულა;
  - ბ. (B) ძალიან კარგი – მაქსიმალური შეფასების 81-90 ქულა;
  - გ. (C) კარგი – მაქსიმალური შეფასების 71-80 ქულა;
  - დ. (D) დამაკმაყოფილებელი – მაქსიმალური შეფასების 61-70 ქულა;
  - ე. (E) საკმარისი – მაქსიმალური შეფასების 51-60 ქულა.
7. შეფასების სისტემა უშვებს ორი სახის უარყოფით შეფასებას:
  - ა. (FX) ვერ ჩააბარა – მაქსიმალური შეფასების 41-50 ქულა.
  - ბ. (F) ჩაიჭრა – მაქსიმალური შეფასების 40 ქულა და ნაკლები.
8. ამ მუხლის მე-7 პუნქტის „ბ“ ქვეპუნქტით გათვალისწინებული შეფასების საფუძველი შეიძლება, ასევე, გახდეს სამაგისტრო ნაშრომის დაცვაზე აკადემიური კეთილსინდისიერების დარღვევის (პლაგიატის) გამოვლენის ფაქტი.
9. წინამდებარე სტანდარტის მიზნებისათვის აკადემიური კეთილსინდისიერების დარღვევის სახეებია:

- ა. პლაგიატი, რაც გულისხმობს გამიზნულად თუ უნებლიედ სხვისი ნაშრომის (იდეების, ცნებების, ფორმულების, გრაფიკების, ცხრილების, გამოსახულებების, დიზაინის და სხვა) საკუთრად წარმოჩენასა და გავრცელებას ავტორის/წყაროს შესაბამისად მითითების (საჭიროების შემთხვევაში, ნებართვის) გარეშე;
  - ბ. თვითპლაგიატი, რაც გულისხმობს სხვა ნაშრომში გამოთქმული საკუთარი მოსაზრებების გამეორებას ორიგინალური წყაროს მითითების გარეშე, ან საკუთარი ნაშრომის ორჯერ ან მეტჯერ წარდგენას სხვადასხვა დავალების ფარგლებში;
  - გ. კომპილაცია, რაც გულისხმობს საკუთარი დამუშავებისა და ინტერპრეტაციის გარეშე საავტორო უფლებით დაცული, სხვის მიერ მიღებული კვლევითი შედეგების/ნაშრომების გამოყენებას და დაჯგუფებას;
  - დ. ფაბრიკაცია/ფალსიფიკაცია, რაც გულისხმობს ნაშრომში მონაცემების ცვლილებას, მონაცემებით მანიპულირებას, მიღებული შედეგების შერჩევითად გამოყენებას, რაც იწვევს შედეგებისა და დასკვნების არასწორ ინტერპრეტაციას.
10. სამაგისტრო ნაშრომის დაცვის კომისიის თავმჯდომარე, სხდომის დასრულებისთანავე, საჯაროდ აცხადებს დასკვნითი გამოცდის/სამაგისტრო ნაშრომის დაცვის საბოლოო შეფასებას.

#### **მუხლი 14. დასკვნითი გამოცდის/სამაგისტრო ნაშრომის დაცვის შეფასების შედეგები**

1. დადებითი შეფასების მიღების შემთხვევაში, შესაბამისი ფაკულტეტის საბჭოს გადაწყვეტილებით, მაგისტრანტს ენიჭება მაგისტრის აკადემიური ხარისხი, რაც დადასტურდება უნივერსიტეტის მიერ მაგისტრის აკადემიური ხარისხის დამადასტურებელი დიპლომისა და დიპლომის დანართის გაცემით. დიპლომს ხელს აწერს შესაბამისი ფაკულტეტის დეკანი და უნივერსიტეტის რექტორი.
2. მინიმალური სტანდარტის მე-13 მუხლის მე-7 პუნქტის „ა“ ქვეპუნქტით გათვალისწინებული შეფასების მიღების შემთხვევაში მაგისტრანტს უფლება ეძლევა, გადამუშავებული სამაგისტრო ნაშრომი წარმოადგინოს მომდევნო სემესტრის განმავლობაში,
3. მინიმალური სტანდარტის მე-13 მუხლის მე-7 პუნქტის „ბ“ ქვეპუნქტით გათვალისწინებული შეფასების მიღების შემთხვევაში მაგისტრანტი კარგავს იგივე სამაგისტრო ნაშრომის წარდგენის უფლებას. მაგისტრანტმა დამატებით სასწავლო სემესტრში უნდა გაიაროს სემესტრული ადმინისტრაციული რეგისტრაცია და შეიმუშავოს ახალი სამაგისტრო ნაშრომი წინამდებარე სტანდარტით დადგენილი წესით.

#### **მუხლი 15. დასკვნითი გამოცდის/სამაგისტრო ნაშრომის დაცვის შედეგების გასაჩივრება (აპელაცია)**

1. თუ მაგისტრანტი არ ეთანხმება დასკვნითი გამოცდის/სამაგისტრო ნაშრომის დაცვის საბოლოო შეფასებას ან მიიჩნევს, რომ დარღვეულია სამაგისტრო ნაშრომის დაცვის რეგლამენტით გათვალისწინებული პროცედურული ნორმები, მას უფლება აქვს, დასკვნითი გამოცდის/სამაგისტრო ნაშრომის დაცვის შეფასების გამოცხადებიდან 5 კალენდარული დღის ვადაში, წერილობით მიმართოს შესაბამისი ფაკულტეტის დეკანს და გაასაჩივროს სამაგისტრო ნაშრომის დაცვის კომისიის მიერ მიღებული საბოლოო გადაწყვეტილება.
2. მაგისტრანტის საჩივარი უნდა იყოს დასაბუთებული. მასში მკაფიოდ უნდა იყოს მითითებული გასაჩივრების საგანი და გამსაჩივრებლის არგუმენტები. ამასთან, გასაჩივრების საგანი შეიძლება, იყოს:
  - ა. დასკვნითი გამოცდის/სამაგისტრო ნაშრომის დაცვის საბოლოო შეფასება, რომელიც მოიცავს



დასკვნითი გამოცდის/სამაგისტრო ნაშრომის დაცვის როგორც წერითი კომპონენტის (ნაშრომის შინაარსობრივი მხარე), ასევე ზეპირი კომპონენტის (ნაშრომის საჯარო პრეზენტაცია და მაგისტრანტის დისკუსიაში მონაწილეობა) შეფასებას. დასკვნითი გამოცდის/სამაგისტრო ნაშრომის დაცვის მხოლოდ ზეპირი კომპონენტის შეფასების გასაჩივრება დაუშვებელია;

ბ. სამაგისტრო ნაშრომის დაცვის რეგლამენტით გათვალისწინებული პროცედურული ნორმების დარღვევა.

3. საჭიროების შემთხვევაში, მაგისტრანტის დასაბუთებული საჩივრის საფუძველზე, შესაბამისი ფაკულტეტის დეკანი იღებს გადაწყვეტილებას აპელაციის განხილვის თარიღისა და სააპელაციო კომისიის შემადგენლობის (მათ შორის, კომისიის თავმჯდომარის) დამტკიცების შესახებ.
4. სააპელაციო კომისია უნდა შედგებოდეს შესაბამისი მიმართულების (დარგის, სპეციალობის) აკადემიური/მოწვეული პერსონალისაგან.
5. სააპელაციო კომისია უნდა შედგებოდეს არანაკლებ 5 წევრისგან. ამასთან, კომისიის შემადგენლობის მინიმუმ ერთი წევრი უნდა იყოს სხვა უსდ-ის წარმომადგენელი.
6. სააპელაციო კომისიის წევრები ინდივიდუალურად აფასებენ დასკვნითი გამოცდის/სამაგისტრო ნაშრომის დაცვის წერით კომპონენტს, შესაბამისი ფაკულტეტის საბჭოს მიერ დადგენილი შეფასების მეთოდებისა და კრიტერიუმების შესაბამისად, სამაგისტრო ნაშრომის მიღებიდან 5 კალენდარული დღის განმავლობაში.
7. დასკვნითი გამოცდის/სამაგისტრო ნაშრომის დაცვის წერითი კომპონენტის საბოლოო შეფასებისათვის სააპელაციო კომისიის თავმჯდომარეს გამოყავს ქულათა საშუალო არითმეტიკული (მიღებული ქულების ჯამი გაყოფილი კომისიის წევრთა რაოდენობაზე).
8. იმ შემთხვევაში, თუ სააპელაციო კომისიის წევრების მიერ დასკვნითი გამოცდის/სამაგისტრო ნაშრომის დაცვის წერითი კომპონენტის საბოლოო შეფასება, შეფასების სისტემის მიხედვით, აღმატება სამაგისტრო ნაშრომის დაცვის კომისიის შეფასებას, ფაკულტეტის დეკანის გადაწყვეტილებით, ინიშნება დასკვნითი გამოცდის/სამაგისტრო ნაშრომის დაცვის ზეპირი კომპონენტის შეფასების თარიღი.
9. სააპელაციო კომისიის წევრები ინდივიდუალურად აფასებენ დასკვნითი გამოცდის/სამაგისტრო ნაშრომის დაცვის ზეპირ კომპონენტს, შესაბამისი ფაკულტეტის საბჭოს მიერ დადგენილი შეფასების მეთოდებისა და კრიტერიუმების შესაბამისად.
10. დასკვნითი გამოცდის/სამაგისტრო ნაშრომის დაცვის ზეპირი კომპონენტის საბოლოო შეფასებისათვის სააპელაციო კომისიის თავმჯდომარეს გამოყავს ქულათა საშუალო არითმეტიკული (მიღებული ქულების ჯამი გაყოფილი კომისიის წევრთა რაოდენობაზე).
11. დასკვნითი გამოცდის/სამაგისტრო ნაშრომის დაცვის საბოლოო შეფასება წარმოადგენს წერითი კომპონენტის საბოლოო შეფასებისა და ზეპირი კომპონენტის საბოლოო შეფასების ჯამს.
12. იმ შემთხვევაში, თუ სააპელაციო კომისიის წევრების მიერ დასკვნითი გამოცდის/სამაგისტრო ნაშრომის დაცვის წერითი კომპონენტის საბოლოო შეფასება, შეფასების სისტემის მიხედვით, არ აღმატება სამაგისტრო ნაშრომის დაცვის კომისიის შეფასებას, ზეპირი კომპონენტის განმეორებითი შეფასება არ ხდება და დასკვნითი გამოცდის/სამაგისტრო ნაშრომის დაცვის საბოლოო შეფასება განისაზღვრება სამაგისტრო ნაშრომის დაცვის კომისიის საბოლოო შეფასებით.
13. თუ მაგისტრანტის აპელაცია შეეხება სამაგისტრო ნაშრომის დაცვის რეგლამენტის პროცედურული ნორმების დარღვევებს, ფაკულტეტის დეკანი მოისმენს როგორც მაგისტრანტის, ასევე დასკვნითი გამოცდის/სამაგისტრო ნაშრომის დაცვის კომისიის წევრების არგუმენტებს და

საკმარისი საფუძვლების არსებობისას, იღებს გადაწყვეტილებას დასკვნითი გამოცდის/სამაგისტრო ნაშრომის დაცვის საბოლოო შეფასების ბათილად ცნობისა და სამაგისტრო ნაშრომის დაცვის ახალი კომისიის შექმნის შესახებ.

#### **მუხლი 16. სამაგისტრო ნაშრომის დასკვნითი შეფასების ბათილობა**

მაგისტრის აკადემიური ხარისხის დამადასტურებელი დიპლომის გაცემის შემდეგ, თუ გამოვლინდა აკადემიური კეთილსინდისიერების დარღვევის ფაქტი ან ცნობილი გახდა გამომცდელზე დაუშვებელი ხერხებით შეფასების მიღების მცდელობის ფაქტი, ეს სამაგისტრო გამოცდის მთლიანად ან ნაწილობრივ ბათილად გამოცხადების, სამაგისტრო დიპლომის ჩამორთმევისა და მინიჭებული ხარისხის გაუქმების საფუძველია.

#### **თავი V. დასკვნითი დებულებები**

#### **მუხლი 17. მინიმალური სტანდარტის ამოქმედება, მაშინ ცვლილებებისა და დამატებების შეტანა**

1. მაგისტრატურის საგანმანათლებლო პროგრამების სამეცნიერო-კვლევითი კომპონენტის დაგეგმვის, განხორციელებისა და შეფასების წინამდებარე მინიმალური სტანდარტი ამოქმედდეს 2021 წლის 1 მარტიდან.
2. მაგისტრატურის საგანმანათლებლო პროგრამების სამეცნიერო-კვლევითი კომპონენტის დაგეგმვის, განხორციელებისა და შეფასების მინიმალურ სტანდარტს ამტკიცებს უნივერსიტეტის წარმომადგენლობითი საბჭო.
3. მაგისტრატურის საგანმანათლებლო პროგრამების სამეცნიერო-კვლევითი კომპონენტის დაგეგმვის, განხორციელებისა და შეფასების მინიმალურ სტანდარტში ცვლილებისა და დამატების შეტანა, ისევე როგორც მისი გაუქმება, წარმოებს ამ მუხლის პირველი პუნქტით დადგენილი წესით.

#### **მუხლი 18. გარდამავალი დებულებები**

1. წინამდებარე მინიმალური სტანდარტის ამოქმედებიდან ორი თვის ვადაში, შესაბამისი ფაკულტეტის საბჭომ მინიმალური სტანდარტის შესაბამისად შეიმუშავოს ფაკულტეტის სამაგისტრო საგანმანათლებლო პროგრამების სამეცნიერო-კვლევითი კომპონენტის დაგეგმვის, განხორციელებისა და შეფასების წესი.

მაგისტრანტის კვლევითი კომპონენტის შესრულების გეგმა

მაგისტრანტის სახელი და გვარი:

ფაკულტეტი:

სამაგისტრო პროგრამა:

სამაგისტრო პროგრამის ხელმძღვანელი/თანახელმძღვანელი:

მაგისტრანტის ხელმძღვანელი:

მაგისტრატურაში ჩარიცხვის თარიღი და ბრძანების ნომერი:

სამაგისტრო ნაშრომის სახელწოდება:

სამაგისტრო ნაშრომის შესრულების (კვლევის) სავარაუდო გრაფიკი

№	აქტივობის დასახელება	შესრულების ვადა	შესრულების თარიღი
1.	სამაგისტრო თემისა და ხელმძღვანელის წინასწარი რეგისტრაცია	არაუგვიანეს სემესტრის დაწყებიდან მე-4 კალენდარულ დღეს ვადაში	
2.	ხელმძღვანელობით განხორციელებული კვლევით კვლევის პროექტზე მუშაობა	სემესტრის დაწყებიდან მე-5 კალენდარული დღე	
3.	კვლევის პროექტზე მუშაობა	სემესტრის დაწყებიდან მე-6 კალენდარული დღე	
4.	ხელმძღვანელობით განხორციელებული კვლევით კვლევის პროექტზე მუშაობა	სემესტრის დაწყებიდან მე-7 კალენდარული დღე	
5.	კვლევის პროექტზე მუშაობა	სემესტრის დაწყებიდან მე-8 კალენდარული დღე	
6.	ხელმძღვანელობით განხორციელებული კვლევით კვლევის პროექტზე მუშაობა	სემესტრის დაწყებიდან მე-9 კალენდარული დღე	
7.	ფაკულტეტზე სამაგისტრო კვლევის პროექტის წარდგენა	სემესტრის დაწყებიდან მე-10 კალენდარული დღე	
8.	კვლევითი პროექტის დაცვა	სემესტრის მე-3 სასწავლო კვირა	
9.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-4 სასწავლო კვირა	
10.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-5 სასწავლო კვირა	
11.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-6 სასწავლო კვირა	
12.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-7 სასწავლო კვირა	
13.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-8 სასწავლო კვირა	
14.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-9 სასწავლო კვირა	
15.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-10 სასწავლო კვირა	
16.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-11 სასწავლო კვირა	
17.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-12 სასწავლო კვირა	
18.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-13 სასწავლო კვირა	

19.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-14 სასწავლო კვირა	
20.	ხელმძღვანელობით განხორციელებული კვლევით სამაგისტრო ნაშრომზე მუშაობა	სემესტრის მე-15 სასწავლო კვირა	
21.	ფაკულტეტზე დასრულებული სამაგისტრო ნაშრომის წარდგენა	სემესტრის მე-16 სასწავლო კვირა	
22.	დასკვნითი გამოცდა/სამაგისტრო ნაშრომის დაცვა	სემესტრის მე-18-მე-19 სასწავლო კვირა	

მაგისტრანტის ხელმოწერა: \_\_\_\_\_

სამაგისტრო ნაშრომის ხელმძღვანელის ხელმოწერა: \_\_\_\_\_